

ԳԼՈՒԽ ԺԴ.

ԱՆԴՐԿՈՎԿԱՍԻ ՔԱՅՔԱՅՈՒՄԸ. — ԱՆԿԱՆՈՒԹԻՒՆՆԵՐ

Այսպէս, Հայոց աշխարհը արեան ու կրակի մէջ էր: Իսկ ինչե՞ր էին կատարուած այդ միջոցին Բաթումում ու Թիֆլիսում:

Մայիս 11-ին, թիւրքերի պայմաններն ստանալուց յետոյ, Անդրկ. պատերազմութիւնը գրաւոր պնդեց Բրեստ-Լիտովսկի պայմանների վրա, և այս առթիւ սկսեց թղթերի փոխանակութիւն թիւրք և անդրկովկասեան պատերազմութիւնների միջև. անդրկովկասցիք անշեղ կանգնած էին Բրեստ-Լիտովսկի պայմանների վրա, բողոքում էին այդ դաշնագրի սահմաններից դուրս ընկնող շրջանների գրաւման դէմ և պահանջում էին, բանակցութիւններին մասնակցեն նաև թիւրքիայի զինակիցները. թիւրքերը հակաճառում ու սպառնում էին:

Այս բանակցութիւնների ընթացքին, մայիս 14-ին, թիւրքերը պահանջեցին անմիջապէս թոյլ տալ թիւրք զորքերին Ալեքսանդրապոլի վրայով անցնել դէպի Զուլֆա: Եւ դեռ պատասխանը չստացւած, ինչպէս տեսանք, յարձակեցին Ալեքսանդրապոլի վրա:

Բանակցութիւններն արագացնելու նպատակով, մայիս 19-ին Գերմանիայի ներկայացուցիչ զոր. Ֆոն Լոսովը առաջարկեց անդրկ. պատերազմութեան իր միջնորդութիւնը: Անդրկովկասեան պատերազմութիւնը, հակառակ ազդրէջանցիների վարանումին, ընդունեց ուրախութեամբ:

Յաջորդ օրը, մայիս 20-ին, Բաթում հասան Հայոց Ազգային Խորհրդի ներկայացուցիչներ բժ. Համ. Օհանջանեանն ու Արշ. Զոհրաբեանը՝ գերման կառավարութեան հովանաւորութիւնը խնդրելու առաքելութեամբ: Մայիս 22-ին այդ իմաստով պաշտօնապէս դիմում արւեց զոր. Ֆոն Լոսովին, և այս վերջինը իսկոյն հեռագրեց Պոլսի գերման դեսպանին այդ դիմումի մասին՝ աւելացնելով միաժամանակ, որ հայ ժողովրդի վիճակը ողբերգական է և որ թիւրքերը ձգտում են գրաւել հայկական դաւառներն ու բնաջնջել հայերին:

Մայիս 24-ին զոր. Ֆոն Լոսովը հաղորդեց անդրկովկասեան պատերազմութեան, որ թիւրքերը մերժեցին միջնորդութեան իր առաջարկը, իսկ մայիս 25-ի երեկոյեան, մի առանձին նամակով, յայտնեց, թէ իր ստացած ստոյգ տեղեկութիւնների համաձայն Անդրկովկասեան Հանրապետութիւնը քայքայման նախօրեակին է գտնուում, որով իր ներկայութիւնը դառնում է անելորդ, և ինքը նոյն օրն և եթ մեկնելու է Բաթումից: